

Inatsisartut suleriaasiat § 37 malillugu, immikkoortoq 1 naapertorlugu matumuuna Naalackersuisunut apeqquut imaattoq saqqummiuppara:

(inatsisartunut ilaasortaq Anthon Frederiksen, Partii Naleraq)

Naalackersuisunut apeqquutit:

- 1. Sinerissami napparsimmaveqarfiit qassit CT-scanner-imik peqarpat?**
- 2. Sinerissami napparsimasut qanoq amerlatigisut Dronning Ingrid-ip napparsimavianut CT-scanner-tikkiartorlutik angalatinneqartartut qanoq amerlatigippat?**
- 3. Peqqinnissaqarfiup iluani eleqqorissaarnissamut siunnersuisooqatigiinnik pilersitsisoqarsinnaanera Naalackersuisut qanoq isumaqarfigaat ?**
- 4. Isorliunerusunik peqqinnissaqarfiup innuttaasunik toqqissisimanartumik sullinneqarnerat qanoq ilillutik Naalackersuisut qulakkeerniarpaat ?**

Tungavilersuut:

Naluneqanngilaq nunatsinni angallanneq akisoorujussuusoq aamma peqqinnissaqarfiup iluani aningaasarpasuit napparsimasut angalatinneqarnerannut atorpeqartarput. Soorunami tamanna pissusissamisoorpoq.

Amma napparsimasut suliaritinniarlutik angallanneqartarnerat pissusissamisoorluinnarpoq, kisianni soorunami naalackersuinikkut ukiorpassuarni eqqartortuarparput, ingerlatsinermut aningaasartuuterpassuit amerliartuinnartut qanoq iliornikkut apparsarneqarsinnaanerat anguniarneqartariaqartoq.

Takorloorneqarsinnaannginnerluni nunatta kujataani (Qaqortumi), nunatta avannaani (Ilulissani) tunumilu (Tasiilami) – CT-scanner-inik pilersitsinikkut, napparsimasut CT-scanner-neqartussat sumiiffinni pineqartuni Nuummut ingerlatinngikkaluarlugit sumiiffinni

qinnguarterneqarlutik misissorneqarnerisigut, angalanernut unnuinernullu angaasartuutit
apparsarneqarsinnaasuut?

Isorliunerusuni innuttaasut peqqinnissaqarnikkut sullinneqarnertik toqqissisimanarinngilaat,
tassa sumiiffimmi peqqinnissaqarfiup matoqqanerata nalaani illoqarfimmut allamut
telefonikkut saaffiginnittariaqartarneq illersorneqarsinnaanngilluinnarmat, pingaartumik
tassanngaannartumik pinartumillu pisoqartillugu.

Taamaammat apeqqutit qulaani taaneqartut akissuteqarfigineqarnissaat pisariaqarpoq.

Apeqqutit ullut suliffiit qulit qaangiutsinnagit akineqarnissaat kissaatingaarput.